

Vijećnička pitanja

Dževdet Huskić: je postavio dva vijećnička pitanja. Prvo pitanje je da li je ikada urađena inspekcija, odnosno pregled ispravnosti kanalizacionog cjevovoda od naselja Zgošća do rijeke Bosne i kakav je rezultat pregleda? Istakao je da već duži niz godina rijeka Zgošća u ljetnom periodu smrdi. Intenzitet bude slabiji ili jači, a u sušnom periodu smrad bude nepodnošljiv, te su zdravstveni rizici veliki. Pitao je da li rukovodstvo JP „Vodokom“ d.o.o. Kakanj ima informaciju o navedenom i da li je išta poduzeto po tom pitanju. Podsjetio je da je sanitarna inspekcija 25.06.2025. godine, izdala Rješenje kojim se naređuje detaljan pregled i sanacija puknuća. Drugo pitanje je da li su poduzeti koraci i koji u vezi sa inicijativom građana o proglašenju prostora oko sela Mioči zaštićenim područjem izmjenama Prostornog plana Općine Kakanj?“

Hamza Vahid El-Din: je postavio dva vijećnička pitanja. Prvo pitanje je koje su aktivnosti poduzete na poboljšanje kvaliteta signala mobilne mreže i interneta u naselju Desetnik u MZ Dumanac? Napomenuo je da je prethodno podnosio vijećničku inicijativu za poboljšanje kvaliteta signala na navedenom području, te je u odgovoru navedeno da će se pokrenuti aktivnosti na iznalaženju rješenja. Međutim, prema informacijama koje ima, nije došlo do poboljšanja, pa je apelovao da se hitno poduzmu aktivnosti na rješavanju problema. Drugo pitanje je kakvo je stanje sa videonadzorom u Kaknju? Prema informacijama kojima raspolaže isti je u prekidu i nakon što je Općina sa MUP-om ZDK uložila značajna sredstva i Policijskoj stanici u Kaknju dala isti na upravljanje i korištenje. Pozvao je nadležno ministarstvo da što prije izdvoji sredstva da bi se osposobilo puno funkcionisanje sistema videonadzora radi sigurnosti građana, te kako bi službenicima u Policijskoj stanici Kakanj olakšali posao. Predsjedavajući je konstatovao da su vijećnici Senad Softić i Amel Kusić postavili vijećničko pitanje bez korištenja govornice.

Senad Softić: je postavio dva vijećnička pitanja. Prvo pitanje je da li u važećem Urbanističkom planu Općine Kakanj postoji predviđena lokacija, odnosno plansko opredjeljenje za formiranje i razvoj poduzetničke ili industrijske zone? Pitanje je postavio uzimajući u obzir činjenicu da Kakanj u posljednje vrijeme bilježi odlazak ili najavu odlaska pojedinih značajnih privatnih privrednih subjekata (npr. „Delibašić Poliuretani“). Smatra da bi postojanje planski uređene poduzetničke zone predstavljalo važan korak ka zadržavanju postojećih privrednih subjekata, privlačenju novih investicija i otvaranju novih radnih mjesta u Kaknju. Drugo pitanje je koliko mjesnih zajednica na području općine Kakanj raspolaže prostorijama za rad, u kakvom su stanju te prostorije i da li postoji plan (projekat) za njihovu sanaciju ili izgradnju novih?

Amel Kusić: je postavio vijećničko pitanje šta su konkretni razlozi zbog kojih vodovodni sistem u MZ Bijele Vode još uvijek nije pušten u funkciju, te kada se može očetivati njegovo konačno puštanje u rad? Napomenuo je da je vodovodni sistem u MZ Bijele Vode završen 2019. godine, pri čemu je realizovana izgradnja crpne stanice, potisnog i povratnog cjevovoda, a u drugoj fazi i rezervoara. Međutim, uprkos završenim radovima vodovod do danas nije pušten u funkciju, dok se mještani MZ Bijele Vode već godinama suočavaju sa ozbiljnim nedostatkom pitke vode.

Vijećničke inicijative

Dževdet Huskić: je pokrenuo vijećničku inicijativu da se prostor ispred pošte nazove „Trg Bergamo“. Inicijativu je podnio iz razloga što smatra da treba iskazati zahvalnost građanima i građankama pokrajine i grada Bergamo – Italija za pomoć Kaknju koju su pružili u periodu 1994-2001, prvo kroz aktivnosti Komiteta Bergamo, a onda kroz pomoć Grada Bergamo koja se ogleda u mnogim infrastrukturnim i drugim društveno korisnim projektima (most u Haljinićima na putu Haljinići-Seoce, izgradnja vodovoda u Gornjem Banjevcu i Ivnici, obnovi

školskih objekata u Velikim Trnvcima, Bištranima i Kraljevoj Sutjesci, pomoći u izgradnji kuća za povratnike, pomoć pri organizaciji obdaništa u školama u Doboju i Tršću).

Vinka Aletović: je pokrenula vijećničku inicijativu da se postave rasvjetna tijela u naselju Bare, u ulici 1.maj, prema Plandištu. Na pomenutoj lokaciji već postoje četiri stuba, ali bez rasvjetnih tijela što u večernjim i noćnim satima stvara otežane uslove za kretanje vozila i pješaka.

Hamza Vahid El-Din: je pokrenuo vijećničku inicijativu da se pokrene postupak oduzimanja Petnaestoaprilskog priznanja – Zahvalnice, dodijeljenog Milenku (Jove) Srdiću, koje je Općinsko vijeće dodijelilo Odlukom o dodjeli Petnaestoaprilskih priznanja 2024. godine, a radi javno iznesenih stavova i izjava koje su u suprotnosti sa vrijednostima zbog kojih mu je priznanje i dodijeljeno. Naglasio je da inicijativa nije usmjerena protiv bilo kojeg pojedinca kao građanina, već je izraz odgovornosti prema vrijednostima koje zajednica mora štiti (istina, dostojanstvo žrtava i međusobno poštovanje). Uz to je također istakao da važeća Odluka o dodjeli Petnaestoaprilskih priznanja ne sadrži odredbe koje regulišu mogućnost oduzimanja već dodijeljenog priznanja, a trenutno postoji situacija koja jasno ukazuje na potrebu normiranja tog pitanja. S toga je pokrenuo inicijativu za izradu i donošenje odluke o izmjenama i dopunama Odluke o dodjeli Petnaestoaprilskih priznanja kako bi se uspostavio jasan, transparentan i pravno utemeljen okvir i osnov za oduzimanje dodijeljenih općinskih priznanja, dodatno zaštitio ugled Općine Kakanj i značaj javnih priznanja, te osigurao transparentan i pravičan postupak odlučivanja.

Adnan Demir: je pokrenuo vijećničku inicijativu za izmjene i dopune Odluke o dodjeli Petnaestoaprilskih priznanja na način da se u članu 3. doda novi stav (2) koji glasi: „Petnaestoaprilska priznanja se ne mogu dodijeliti nosiocima javnih funkcija u zakonodavnoj i izvršnoj vlasti na svim nivoima vlasti u Bosni i Hercegovini za vrijeme trajanja njihovog mandata.“ Inicijativu je podnio iz razloga što smatra da dodjela javnih priznanja licima koja istovremeno obnašaju funkcije vlasti stvara percepciju političke pristrasnosti, čime se priznanja udaljavaju od svoje osnovne svrhe da budu odraz društvenog priznanja za izuzetne doprinose zajednici. Istakao je da predložena izmjena Odluke ne dovodi u pitanje individualne zasluge nijednog pojedinca, već uspostavlja principijelan i sistematski standard kojim se štiti integritet institucija, jača povjerenje građana i osigurava da općinska priznanja zadrže svoj stvarni društveni značaj.

Predsjedavajući je konstatovao da su vijećnici Amel Kusić i Irna Imamović podnijeli vijećničke inicijative bez korištenja govornice.

Amel Kusić: je pokrenuo vijećničku inicijativu da se postavi dodatni stub javne rasvjete u ulici V divizije NOP-a u MZ Varda, na dionici od parcele u vlasništvu Hasiba Spahića do parcele Midhata Škulja. Na navedenoj lokaciji je evidentan prevelik raspon između postojećih stubova javne rasvjete, što za posljedicu ima istegnuće kabla javne rasvjete. Kabal se trenutno nalazi na visini koja je na najnižoj tački u desegu dohvata pješaka i djece. Traži da se realizaciji inicijative pristupi hitno imajući u vidu potencijalnu opasnost.

Irna Imamović: je pokrenula dvije vijećničke inicijative. Prva inicijativa je da se izvrši hitna provjera stanja i poduzmu mjere na sanaciji podvožnjaka u MZ Doboju, ispod dionice autoputa Kakanj – Sarajevo s ciljem njegovog stavljanja u funkcionalno i sigurno stanje za korištenje. Podvožnjak već duži vremenski period nije u funkciji, naročito u vrijeme padavina i nepovoljnih vremenskih prilika kad je pun vode, a istovremeno predstavlja važnu komunikaciju za lokalno stanovništvo uključujući mještane naselja Banjevac i Koprivnica, naročito djecu koja svakodnevno koriste taj pravac na putu do škole, zbog čega su prinuđeni koristiti alternativne pravce (oko 1km duže) da bi prešli na drugu stranu puta. Druga inicijativa je da se na pružnom prelazu na relaciji Kakanj – Sarajevo u MZ Doboju hitno poduzmu mjere dodatnog osiguranja prelaza, uključujući postavljanje svjetlosne signalizacije (semafora) i rampe. Predmetni prelaz je vrlo frekventan i svakodnevno ga koristi veliki broj

mještana naselja Doboj, Banjevac, Koprivnica i Hrasnica, a naročito djece na putu do škole. Trenutno na pružnom prelazu ne postoje adekvatne mjere zaštite, osim saobraćajnog znaka što nije dovoljno imajući u vidu frekvenciju saobraćaja i pješaka.